

Šok na Tušnju: Đurić golom u 90. minuti donio pobjedu Radniku (Foto)

Umjesto pobjede koju su najavljivali uoči utakmice, igrači Slobode su i u drugom susretu na otvaranju sezone doživjeli poraz i pri tome još nisu zatresli mrežu protivničkih golmana.

Ovaj na Tušnju pred oko 2.500 navijača, veoma je bolan i pokazuje da će "crveno-crni" imati itekako problema da izbore plasman u Ligu 6, što su označili kao cilj.

Utakmica je obilovala akcijama i brojnim šansama. Tuzlaci su imali više od igre i bolje prilike u prvom poluvremenu, Radnik je krajem prvog i početnog drugog djelovao opasnije, dok je junak utakmice bio golman Azir Muminović.

Domaći tim imao je u 23. minuti veliki peh, kada je u padu lijevo rame ozlijedio napadač Anel Husić, pa je zamijenjen Ismarom Tandinom.

Upravo je Husić u 6. minuti imao prvu priliku za gol, kada je u skoku šutirao pokraj stative. U 22. minuti pokraj gola šutirao je i Milan Čulum, nakon kornera koji je izveo Amer Osmanagić. Nešto poslije šutirao je i tandir, ali se mreža Mladena Lučića nije zatresla.

U 27. minuti najbolja prilika za Tuzlake. Nakon slobodnjaka Osmanagića, Čulum je sa 5-6 metara žestoko šutirao, ali je gol Bijeljinača blokiranjem spasio Davor Arnautović.

Nakon pola sata igrači Radnika su se oslobodili pritiska i izveli su nekoliko opasnih napada. U 33. minuti dobro je šutirao Nenad Srečković, ali je Muminović sjajno odbranio.

Golman domaćih istaknuo se i u 40. minuti kada je šutirao Damir Peco, a čuvar mreže Slobode loptu je izbacio u korner.

U finišu prvog dijela susreta Sulejman Krpić je mogao dovesti domaće u vodstvo, ali je u gužvi neko od igrača Radnika spriječio pogodak.

U 53. minuti Muminović je još jednom majstorski zaustavio šut Pece, a nešto poslije i Ševke Okića u situaciji "oči u oči".

U 76. minuti Tuzlaci su nastavili s igračem manje, jer je Krpić dobio crveni karton zbog nepopisnog starta nad jednim igračem odbrane Radnika.

U redovima Slobode bilo je sve više nervoze, izmjene koje je izveo trener Vlado Jagodić nisu urodile plodom, a onda je stigao šok.

Kada se očekivala podjelu bodova, Velibor Đurić je u 90. minuti uspio iskoristiti slabu reakciju odbrane Slobode i postigao je gol za prvu pobjedu Bijeljinača. (tl – Foto: Miroslav Petrović)

Rezultati 2. kola:

Vitez – Krupa 1:1, Mladost – Željezničar 2:1, Sloboda – Radnik 0:1, Zrinjski – Široki 1:0, dok sutra igraju GOŠK – Borac i Čelik – Sarajevo.

POREDAK:

Mladost i Zrinjski po 6 bodova, Radnik 4, Široki, Borac (susret manje) i Željezničar po 3, Krupa 2, Vitez 1, Sarajevo 0 (susret manje), Čelik 0 (susret manje), GOŠK 0 (susret manje), Sloboda bez bodova.

Date: 29-07-2017